

Дегтр хулдлгъна тускар

Мана советск улс чадх-чадх эврәннь тааста кѳдлмштән кѳдлцхадж, кѳч-кѳлснә ик диилврмѳд бәрдж йовцхана. Эднә бәәдл-джиргълин ѳслгд болн кедж йовх кѳдлмштнъ—дегтр ик чинртә. Дегтрәр да-хулдж әмтн эврәннь медрлан гѳудѳлнә.

Мана Хальмг республикин кѳч-кѳлсчнр, кѳдлчнр, ѳулд церглчнр, сургъулчнр дунд дегтрт эс дурлдг кѳн уга. Тегәд чигн мана республикин хотл балгъсна болн райодин, поселксин болн селәдин дегтрин магазиндәр, ларексар, киосксар дегтрмѳд хулдж авдг улсин тонь ѳдр ирвәс ѳсәд йовна.

Болв Хальмг республикин хол газрумудар кѳлдж йовх кѳч-кѳлсчнриг политическ, художественн, селәнә эдл-ахун дегтрмѳдәр тетклгън ик татугъар кегддјәнә.

Хальмг бичәчнрин кесг олн цеглгдтә, келвртә, повестьстә 1-ч, 2-ч номергә „Теегин герл“ гидг альманах, „Дуулич, тесем, дуулич“ гидг дуулин хуранъгъу, эклц классмудин „Тѳрски келн“ болн „Арифметик,“ нань чигн дегтрмѳд джилин дунд, хальмг дегтр гаргъач барас гаргъв.

Дегтр хулдж аех улсин тонь йир олн. Хѳбнд, малд кѳлдж йовх улсиг, аль-бис дегтрмѳдәр тетклгън — гуулгәнә организацсин эрки тѳр. Болв дегтрмѳд райодин, селәдин болн фермсин магазиндәр ик хуурмг кевәр хулдгдна. Нам альдас хулдж авхан чигн эдн мелхш. Ирси дегтр-

мѳд олн-әмтни дунд хулдгдлго, складмудар кевтдг чигн сам олн. Гуулгәнә организацсин гардачнр эн хаджгър йовдлмудиг медә бәәсн бийснь, кергтән авцхахш.

Мана республикин райодин фермсәр, хѳбнә хошмудар бәәх әмтс тѳрски келәр гарси дегтрмѳдиг зугл газетәр дамдждж сонъсцхана.

Мана республикин колхозмудин болн совхозмудин фермсәр, бригадсар олн хальмг ѳркбулмѳд бәәцхәнә. Эдн дегтр умшхдан, нег ѳлѳ тѳрски келәр умшхдан йир дурта. Гуулгәнә организацсин салнъ йовдлмудас кѳлтә, мана кѳч-кѳлсчнр кергтә дегтрән цагланъ хулдж авдг аргъ уга болцхана.

Шидрәс сургъулин шин джил эклхмн. Тегәд эврә тѳрски келәр гарси эклц классмудин дегтрмѳд хәәхлә школд, магазиндәр болн залгълдана отделенъсәр уга болдж гарна.

Республикин гуулгәнә организацс эн тоот олн-әмтнә некврәр онц тѳр кедж, теднә кѳдлмшин джисәг улмар гѳдджртгә болгъхин тѳләд, эдн дунд олн-зѳси политическ, художественн, селәнә эдл-ахун дегтрмѳд хулдлгъиг ѳргәр делгрѳлх зѳвтә. Орс келәр гарчксн „Джанъгър“ ирчксн бәәнә. Терѳг потребкооперацин учрежленъс складтан удан бәрл уга, колхозмудин болн совхозмудин хол хошмудар бәәх әмтст тѳгәдж хулдлгън — эрки керг болджана.

Н. ТИМАШОВ.
А. БАДМАЕВ.

Умшачнр.